

摘藻堂四庫全書薈要

史部

明史紀事本末卷十五

浙江提學僉事谷應泰編

削奪諸藩

太祖洪武三十一年閏五月建文帝卽位詔改明年為建文元年帝太祖之孫懿文太子之子也生十年而懿文卒高祖年六十有五矣御東角門對羣臣泣翰林學士劉三吾進曰皇孫世適富于春秋正位儲極四海繫

心皇上無過憂高皇曰善九月庚寅立為皇太孫時諸王以叔父之尊多不遜一日太孫坐東角門召侍讀太常卿黃子澄告之曰諸叔各擁重兵何以制之子澄以漢平七國事為對太孫喜曰吾獲是謀無慮矣初太祖建都金陵去邊塞六七千里元裔時出沒塞下捕殺吏卒以故命並邊諸王得專制國中擁三護衛重兵遣將徵諸路兵必開白親王乃發洪武九年五星齋度日月相刑訓導葉居升應詔陳言極論分封太多略曰日者

君之象也月者臣之象也五星者鄉士庶人之象也臣
愚不知星術姑以所聞於經傳并撫前世已行之得失
者論之詩曰彼月而食則維其常今日刑于月猶之可
也而日月相刑則月敢抗于日者臣敢抗于君矣傳曰
都城過百雉國之害也國家懲宋元孤立宗室不競之
弊秦晉燕齊梁楚吳閩諸國各盡其地而封之都城宮
室之制廣狹大小亞于天子之都賜之以甲兵衛士之
盛臣恐數世之後尾大不掉然後削之地而奪之權則

起其怨如漢之七國晉之諸王否則恃險爭衡否則擁
衆入朝甚則緣間而起防之無及也今議者曰諸王皆
天子親子也皆皇太子親弟也何不撫漢晉之事以觀
之乎孝景皇帝漢高帝之孫也七國之王皆景帝之同
宗父兄弟子孫也當時一削其地則構兵西向晉之諸
王皆武帝之親子孫也易世之後迭相擁兵以危王室
遂成五胡雲擾之患由此言之分封踰制禍患立生援
古証今昭昭然矣昔賈誼勸漢文帝早分諸國之地空

之以待諸王子孫謂力少則易使以義國小則無邪心
願及諸王未國之先節其都邑之制減其衛兵限其疆
里亦以待封諸王之子孫此制一定然後諸王有聖賢
之德行者入為輔相其餘世為藩輔可以與國同休世
世無窮矣太祖怒繫死獄中後無敢言者至是太祖崩
遺詔曰朕受皇天之命膺大任于世三十有一年憂危
積心日勤不怠專志有益于民奈何起自寒微無古人
之博智好善惡惡不及多矣今年七十有一筋力衰微

朝夕危懼慮恐不終今得萬物自然之理其奚哀念之
有皇太孫允炆仁明孝友天下歸心宜登大位中外文
武臣僚同心輔佑以福吾民葬祭之儀一如漢文帝勿
異布告天下使知朕意孝陵山俱因其故勿改諸王臨
國中無得至京王國所在文武吏士聽朝廷節制惟護
衛官軍聽王諸不在令中者推此令從事辛卯皇太孫
即皇帝位葬孝陵援遺詔止諸王會葬詔下諸王不悅
謂此齊尚書踈間也 六月戶部侍郎卓敬密奏裁抑

宗藩疏入不報於是燕周齊湘代岷諸王頗相煽動有流言聞于朝帝患之謀諸齊泰泰與黃子澄首建削奪議乃以事屬泰子澄一日罷朝召子澄曰先生憶昔東角門之言乎對曰不敢忘子澄退與齊泰謀之泰曰燕握重兵且素有大志當先削之子澄曰不然燕預脩久卒難圖宜先取周剪燕手足即燕可圖矣乃命曹國公李景隆調兵猝至河南圍之執周王及其世子妃嬪送京師削爵為庶人遷之雲南冬十一月代王居藩有

貪虐狀方孝孺請以德化道之帝遣之入蜀使與蜀王居時蜀王素以賢聞故也 十二月前軍都督府斷事

高巍上書論時政曰我高皇帝上法三代之公下洗嬴秦之陋封建諸王凡以衛中國屏四裔為聖子神孫計至遠也夫何地大兵強易以生亂今諸藩驕逸違制不削則廢法削之則傷恩賈誼曰欲天下之治安莫若衆建諸侯而少其力臣愚謂今宜師其意勿施晁錯削奪之策效主父偃推恩之令西北諸王子弟分封于東南東南諸

王子弟分封於西北小其地大其城以分其力如此則藩王之權不削自弱矣臣又願陛下益隆親親之禮歲時伏臘使問不絕賢如河間東平者下詔褒賞不法如淮南濟北者始犯則容再犯則赦三犯而不改則告廟削地而廢處之寧有不服順者哉上嘉之然不能用

建文元年春二月令親王不得節制文武吏士更定官制夏四月人告岷王梗不法事削其護衛誅其導惡指揮宗麟廢為庶人又以湘王栢偽造鈔及擅殺人降

敕切責仍遣使以兵迫執之湘王曰吾聞前代大臣下吏多自引決身高皇帝子南面為王豈能辱僕隸手求生活乎遂闔宮自焚死又以人告齊王搏陰事詔至京廢為庶人拘繫之幽代王桂于大同廢為庶人未幾靖難兵起

谷應泰曰聞之周南始化二公分陝及其東遷晉鄭焉依以故衆建諸侯分王子弟屏藩天室拱衛京師勢綦重也高皇帝大寶既定剪桐論封燕王

居北平代王居代郡寧王居大寧碁布星羅屹然
立社揣其深謀不特維城之磐石抑亦北門之鎖
鑰耳惟是并州警備多蓄重兵馬邑防秋得專節
制鄭京城實危莊公晉曲沃實弑孝侯大都耦國
禍之本也又况秦晉四府湘岷六藩莫不帝制自
為偃蹇坐大藉神明之胃挾肺腑之尊揚水以鄰
鄰而興周道以親親而弱變所從來非無故矣况
乎冲齡御極主少國疑強宗亂家視同赧獻斯時

賈生抱哭卽召吳楚之兵主父設謀便啓晉陽之
甲將使三家盡分公室餘地悉入廩延正所謂養
虎貽患畜癘必潰者也故論者謂建文之失在于
削諸藩而予則以諸藩者削亦反不削亦反論者
又以建文之失在於削強藩而予則以不削強藩
者燕王最強最先反寧王次強必次反毋怪齊泰
黃子澄輩拊膺厝火握手閣門次第芟除計安宗
社然而忠則竭矣算亦稍絀焉考其時周王岷王


都被掩捕齊藩代藩並皆幽廢寧邸護衛見削湘
王闔宮自焚數月之內大獄屢興案驗未明葛藟
不茆必有托蒼天以報仇生皇家而勿願者況又
中涓入燕逮繫官屬幾于十王並戮七國行誅釁起
兵端非無口實矣以予論之方太祖小祥之時正諸
藩遣子之日宜于大內置百孫院因而留之仍擇名
臣傳之禮義四小侯就學于漢即長安君入質于秦
也而又分命洪武舊勲以撫綏為名開閭通州分屯

河濟倣亞夫之堅壁立辛毗于軍門仍賜溫綸躬
行德化梁王罪狀咸悉燒除吳王不臣錫之几杖
則天潢諸嗣逆節雖萌反形猶戢而稍俟諸子弟
年各冠婚即以尺一之詔分裂其地國小則永無
邪心內割則未遑外事天下亂絲可徐理而解也
獨奈何葉居升之奏被譴于高皇而方孝孺之謀
不行于嗣主比齊黃輩分道徵兵直出無策而石
頭被詔激變蘇峻江陵蒙討逼反桓玄謀之不臧

誰執其咎哉迨至燕兵南下建業合圍而谷穗獻
門安楹首附周齊列藩以次復爵同惡相保理固
然也獨是蜀王之賢無與興廢之謀超然評論之
外雖河間之書集博士而畢讀東平之樹望咸陽
而俱靡何以加焉



明史紀事本末卷十五



總校官庶吉士臣張能照

校對官編修臣閔惇大

謄錄監生臣楊星乙

謄錄監生臣任益春

欽定四庫全書薈要

史部


明史紀事本末卷十六



明史紀事本末卷十六

浙江提學僉事谷應泰編

燕王起兵

太祖洪武三年夏四月詔封皇子棣為燕王太祖第四子也

十一年冬十二月定諸王宮城制式太祖曰除燕王宮殿仍元舊諸王府營造不得引以為式

二十三年春二月命潁國公傅友德為將軍聽燕王節制征沙漠初燕王既之國太祖欲諸王知軍旅乃勅秦王晉王燕王督諸將分道北征已而秦王晉王師久不出燕王率友德等北出至迤都山擒其將鼎爾布哈二十五年夏四月丙子皇太子薨皇太孫生而額顱稍偏性聰穎善讀書然仁柔少斷太祖每令賦詩多不喜一日令之屬對大不稱旨復以命燕王語乃佳太祖常有意易儲劉三吾曰若然置秦晉二王何地太祖乃止

二十八年初諸王封國時太祖多擇名僧為傳僧道衍知燕王當嗣大位自言曰大王使臣得侍奉一白帽與大王戴蓋白冠王其文皇也燕王遂乞道衍得之道衍至燕邸薦鄆人袁珙相術燕王使召之至今使者與飲于酒肆王服衛士服偕衛士九人入肆沽珙趨拜燕王前曰殿下何自輕如此燕王陽不省曰吾輩皆護衛校士也珙不對乃召入詳叩之珙稽首曰殿下異日太平天子也燕王恐人疑乃佯以罪遣之行至通州既登舟

密召入邸

三十一年閏五月太祖崩建文皇帝即位遺詔止諸王
入臨會葬燕王入將至淮安齊泰言於帝令人齎勅使
還國燕王不悅 秋七月帝命李景隆訊周王橐逮至
京廢為庶人燕王見周王被執且齊泰黃子澄用事遂
簡壯士為護衛以勾逃軍為名異人術士多就之 冬
十月熒惑守心四川岳池教諭程濟通術數上書言北
方兵起期在明年朝議以濟妄言召入將殺之濟曰陛

下幸囚臣至期無兵殺臣未晚也乃囚濟於獄 十一

月燕齊有告變者帝問黃子澄曰孰當先子澄曰燕王
久稱病日事練兵且多賓異人術士左右此其機事已
露不可不急圖之復召齊泰問曰今欲圖燕燕王素善
用兵北卒又勁奈何泰對曰今北邊有寇警以防邊為
名遣將戍開平悉調燕藩護衛兵出塞去其羽翼乃可
圖也從之乃以工部侍郎張昺為北平左布政使以謝
貴為都指揮使俾察燕王動靜圖之魏國公徐輝祖燕

王妃同產兄也時以燕事密告之帝大見信用詔加太子太傅與李景隆同掌六軍協謀圖燕

建文元年春正月燕王遣長史葛誠入奏事帝密問燕邸事誠具以實告遣誠還燕使為內應至則燕王察其色異心疑之二月燕王入覲行皇道入登陞不拜監察御史曾鳳韶劾王不敬帝曰至親勿問戶部侍郎卓敬密奏曰燕王智慮絕人酷類先帝夫北平者強幹之地金元所由興也宜徙封南昌以絕禍本帝覽奏袖之

翼日曰燕王骨肉至親何得及此敬曰隋文楊廣非父子耶帝嘿然良久曰卿休矣三月燕王還國帝以都督耿璫掌北平都司事都御史景清署北平布政司參議皆使覘燕邸事尋皆召還又遣官為採訪使分巡天下都御史暴昭採訪北平具以燕邸事密聞于朝請為之備北平按察使僉事湯宗上變告按察使陳瑛受燕金有異謀逮瑛安置廣西遂勅都督宋忠率兵三萬及燕府護衛精銳俱選隸宗麾下屯開平名備邊仍命

都督耿璈練兵于山海關徐凱練兵于臨清密勅張曷
謝貴嚴為之備又召燕番騎指揮闕童等入京師燕

王歸國即托疾久之遂稱篤夏四月太祖小祥燕王

遣世子及其弟高煦高燧入臨或曰不宜偕往王曰令

朝廷勿疑也及至京齊泰請并留之黃子澄曰不可疑

而備之殆也不若遣還世子兄弟皆魏國公徐輝祖甥

輝祖察高煦有異志密奏曰三甥中獨高煦勇悍無賴

非但不忠且叛父他日必為大患帝以問輝祖弟增壽

及駙馬王寧皆庇之乃悉遣歸國高煦陰入輝祖廐取其馬以行輝祖使人追之不及初世子入京燕王大憂悔暨歸喜曰吾父子復得相聚天贊我也已而燕兵起高煦戮力為多帝曰吾悔不用輝祖之言六月燕山護衛百戶倪諒上變告燕官校于諒周鐸等陰事逮繫至京皆僇之有詔責燕王王乃佯狂稱疾走呼市中奪酒食語多妄亂或卧土壤彌日不甦張昺謝貴入問疾王盛夏圍爐搖頭曰寒甚宮中亦杖而行朝廷稍信之

長史葛誠密告曷貴曰燕王本無恙公等勿懈會燕王使其護衛百戶鄧庸詣闕奏事齊泰請執訊之具言王將舉兵狀齊泰即發符遣使往逮燕府官屬密令謝貴張曷圖燕使約長史葛誠指揮盧振為內應以北平都指揮張信為燕王舊所信任密勅之使執燕王信受命憂甚不敢言母疑問之信以告母驚曰不可吾故聞燕王當有天下王者不死非汝所能擒也信益憂未決亡何勅使促之信艷然曰何太甚也乃往燕邸請見不得

入乘婦人車徑至門求見乃召入拜于床下燕王佯為風疾不能言信曰殿下無爾也有事當以告臣燕王曰疾非妄也信曰殿下不以情語臣上擒王矣當就執如有意勿諱臣燕王見其誠下拜曰生我一家者子也乃召僧道衍至謀事適暴風雨簷瓦墮燕王心惡之色不懌道衍以為祥王謾罵和尚妄烏得祥道衍曰殿下不聞乎飛龍在天從以風雨瓦墜天易黃屋耳王喜有布政司吏奈亨按察司吏李友直密以疏草示燕王因留匿邸

中燕王出其疏草示護衛指揮張玉朱能等曰此何為者遂令玉等率壯士八百人入衛貴等以在城七衛并屯田軍士圍王城又以木柵斷端禮等門未幾削爵及逮官屬詔至 秋七月謝貴張昺督諸衛士皆甲圍府第索所逮諸官屬飛矢入府內燕王與張玉朱能等謀曰彼軍士滿城市吾兵甚寡奈何朱能曰先擒殺謝貴張昺餘無能為也燕王曰是當計取之今奸臣遣使來逮官屬依所坐名收之即令來使召昺貴付所逮者貴昺

必來來則擒之一壯士力耳壬申王稱疾愈御東殿官
僚入賀燕王先伏壯士左右及端禮門內遣人召貴曷
不來復遣官屬內官以所就逮名往乃至衛士甚衆及
門門者呵止之貴曷入燕王曳杖坐賜宴行酒出瓜數
器曰適有進新瓜者與卿等嘗之燕王自進片瓜忽怒
且詈曰今編戶齊民兄弟宗族尚相恤身為天子親屬
旦夕莫必其命縣官待我如此天下何事不可為乎擲
瓜于地護衛軍皆怒前擒貴曷梓盧振葛誠等下殿王

投杖起曰我何病迫于若奸臣耳遂曳貴曷等皆斬之
貴曷諸從人在外者尚未知見貴曷移時不出各稍稍
散去圍王城將士聞貴曷已被執亦潰散北平都指揮
彭二聞變急跨馬大呼市中聚兵千餘人欲入端禮門
燕王遣健卒龐來興丁勝格殺二兵亦散燕王乃命張
玉等率兵乘夜出攻奪九門黎明已克其八唯西直門
未下王命指揮唐雲單騎往諭守者曰汝毋自苦今朝
廷已聽王自制一方矣汝等亟下後者誅衆聞言皆散

乃下令安集軍民三日城中大定都指揮使余瑱既與
謝貴合謀不遂乃走守居庸關馬宣巷戰不勝東走薊
州宋忠自開平率兵三萬至居庸關不敢進退保懷來
癸酉燕王誓師以誅齊泰黃子澄為名去建文年號仍
稱洪武三十二年署官屬以張玉朱能丘福為都指揮
僉事擢李友直為布政司叅議拜卒金忠為燕紀善金
忠浙江鄞縣人精于卜燕師將起召忠卜之以大吉告
遂署為紀善命侍帷幄用其謀策時布政司叅議郭資

按察司副使墨麟都指揮同知李濬陳恭等皆降下令
諭將士曰予太祖高皇帝之子今為奸臣謀害祖訓云
朝無正臣內有奸逆必舉兵誅討以清君側之惡用率
爾將士誅之罪人既得法周公以輔成王爾等其體予
心乃上書曰皇考太祖高皇帝艱難百戰定天下成帝
業傳之萬世封建諸子鞏固宗社為磐石計奸臣齊泰
黃子澄包藏禍心櫛擗栢桂梗五弟不數年間並見削
奪栢尤可憫闔室自焚聖仁在上胡寧忍此蓋非陛下

之心實奸臣所為也心尚未足又以加臣臣守藩于燕二十餘年寅畏小心奉法循分誠以君臣大分骨肉至親恒思加慎為諸王先而奸臣跋扈加禍無辜執臣奏事人箠楚刺熱備極苦毒迫言臣謀不軌遂分宋忠謝貴張昺等於北平城內外甲馬馳突於街衢鉦鼓喧鞠于遠邇圍守臣府已而護衛人執貴昺始知奸臣欺詐之謀竊念臣於孝康皇帝同父母兄弟也今事陛下如事天也譬伐大樹先剪附枝親藩既滅朝廷孤立奸臣得志

社稷危矣臣伏覩祖訓有云朝無正臣內有好惡則親王訓兵待命天子密詔諸王統領鎮兵討平之臣謹俯伏俟命書奏詔削燕王屬藉甲戌燕王以郭資守北平出師次通州指揮房勝以城降張玉曰不先定薊州將為後患時都督指揮馬宣嚴兵守薊州燕王命玉率兵往攻玉使人諭之不下環城攻之宣率衆出戰敗被執罵不絕口遂死之指揮毛遂以薊州降玉撫定薊州乘夜趨遵化戒將士止殺曰行師以得人心為本因簡勇

士以夜四鼓登城開門而入城中始覺遵化衛指揮將
王密雲衛指揮鄭亨皆以城降甲申燕兵攻懷來時余
瑱守居庸簡練關卒得數千人將進攻北平燕王曰居
庸險隘北平之咽喉我得此可無北顧憂瑱若據此是
拊我背也宜急取之緩則增兵繕守後難圖矣令指揮
徐安鍾祥等擊瑱瑱且守且戰援兵不至乃棄關走懷
來依宋忠燕王曰宋忠握兵懷來必爭居庸宜乘其未
至擊之諸將皆曰彼衆我寡難以爭鋒擊之未便宜固

守以待其至王曰當以智勝難以力取彼衆新集其
心不一宋忠輕躁寡謀狠愎自用乘其未定擊之必破
矣遂帥馬步精銳八千捲甲倍道而進王據鞍指揮有
喜色先是宋忠給將士云爾等家在北平城中皆為燕
兵所殺屍積道路欲以激怒將士燕王令其家人張樹
旗幟為先鋒衆遙識旗幟呼其父兄子弟相問勞無恙
輒喜謂宋都督欺我倒戈走宋忠帥餘衆倉皇列陣未
成王麾師渡河鼓噪而前都指揮孫泰先登頗有斬獲

燕王擇善射者射泰中之流血被甲慷慨裹血而戰奮
呼陷陣死忠軍大敗奔入城燕兵乘之而入忠匿於廁
搜獲之并執余瑱皆不屈死都指揮彭聚亦力戰死當
時諸將校為燕師所俘者百餘人皆不肯降發憤死燕
兵既克懷來山後諸州皆不守而開平龍門上谷雲中
守將往往降附矣丙戌永平指揮陳旭趙彝郭亮以城
降旭等遂從燕將徐忠分兵克灤河庚寅大寧都指揮
卜萬與其部將陳亨劉貞引兵號十萬出松亭關駐沙

河進攻遵化燕王聞之援遵化萬等退保松亭關萬有智勇陳亨陰欲輸款于燕畏萬不敢發燕王貽萬書盛稱萬而詆亨緘識之召所獲大寧卒解縛賞勞俾歸密與萬故使同獲卒見之尋遣與俱至則同歸卒發其事陳亨劉貞搜得與萬書遂縛萬下獄聞於朝籍其家時帝方銳意文治日與方孝孺等討論周官法度以北兵為不足憂黃子澄謂北兵素強不早禦之恐河北遂失乃以長興侯耿炳文佩大將軍印駙馬都尉李堅為

左副將軍都督寧忠為右副將軍帥師北伐子澄又請
命安陸侯吳傑江陰侯吳高都督都指揮盛庸潘忠楊
松顧成徐凱李文陳暉平安等帥師並進擢程濟為翰
林編修充軍師護諸將北行吳傑等各帥偏師步騎號
百萬數道並進期直搗北平檄山東河南山西三省合
給軍餉帝誡諸將士曰昔蕭繹舉兵入京而令其下曰
一門之內自極兵威不祥之極今爾將士與燕王對壘
務體此意毋使朕有殺叔父名 八月己酉耿炳文等

率兵三十萬至真定徐凱率兵十萬駐河間潘忠駐莫
州楊松帥先鋒九千人據雄縣約忠為應張玉往覘炳
文營還報燕王曰炳文軍無紀律其上有敗氣無能為
潘忠楊松扼吾南路宜先擒之燕王悅躬擐甲胄帥師
至涿州壬子屯於婁桑令軍士秣馬蓐食晡時渡白溝
河謂諸將曰今夕中秋彼不備飲酒為樂此可破也夜
半至雄縣緣城而上松與麾下九千人皆戰死獲馬八
千餘匹燕王度潘忠在莫州未知城破必引衆來援諭

諸將曰吾必生擒潘忠諸將未喻遂命譚淵領兵千餘渡月漾橋伏水中領軍士數人伏路側望忠等接戰即舉砲既而忠等果至王進兵逆擊之路傍砲舉水中伏兵起據橋忠戰敗趨橋不得燕兵腹背夾擊遂生擒忠餘衆多溺死燕王問諸將帥所嚮衆未有定王曰當徑趨真定彼衆新集我軍乘勝可一鼓破之燕王曰善即趨真定耿炳文部將張保來降保言炳文兵三十萬先至者十三萬分營潯沱河南北燕王厚撫保遣歸詐言

保兵敗被執幸守者困得脫竊馬歸又令言雄莫敗狀
燕兵旦夕且至諸將請曰今由間道不令彼知蓋掩其
不備奈何遣保告之為備王曰不然始不知彼虛實故
欲掩襲之今知其半營河南北則當令知我至其南岸
之衆必移于北并力拒戰一舉可盡殲之兼使知雄縣
莫州之敗以奪其氣兵法所謂先聲後實也若徑薄城
下北岸雖勝南岸之衆乘我戰疲鼓行渡河是我以勞
師當彼逸力也壬戌燕王率三騎先至真定東門突

入其運糧車中擒二人訊狀南岸營果北移率輕騎數十繞出城西南破其二營炳文出城迎戰張玉譚淵馬雲朱能等率衆奮擊燕王以奇兵出其背循城夾擊橫貫南陣炳文大敗奔還朱能與敢死士三十餘騎追奔至滹沱河東炳文衆尚數萬復列陣向能奮勇大呼衝入炳文陣陣衆披靡自相蹂躪死者無算棄甲降者三千餘人騎士薛祿引槊中李堅墜馬獲之甯忠顧成及都指揮劉燧皆被執燕王謂堅至親送北平道卒謂

成先朝舊人解其繫與語曰皇考之靈以汝授我因語以故言已泣下成亦泣遂遣人護送北平令輔世子居守炳文奔入真定軍爭門門塞不得入相蹈藉死者甚衆炳文入闔門固守吳傑帥師來援兵潰遁還燕兵攻城三日不能下燕王還北平以擒李堅功授薛祿指揮帝聞怒曰老將也而摧鋒奈何子澄曰勝敗常事毋足慮聚天下之兵得五十萬四面攻北平衆寡不敵必成擒矣曰孰堪將者子澄曰李景隆可比用景隆今破矣

遂遣景隆代炳文臨行賜景隆通天犀帶親餞之江潁
復賜斧鉞俾專征伐不用命者僇之召耿炳文回
九月朔監察御史康郁上言臣聞人主親其親然後不獨
親其親今諸王親則太祖之遺體也貴則孝康之手足
也尊則陛下之叔父也乃殘酷豎儒持一己之偏見廢
天下之大公方周王不軌進言則曰六國反叛漢帝削
地執法則曰三叔流言周公是征遂使周王父子流離
播遷周王既竄湘王自焚代王被廢而齊臣又告王反

矣為計者必曰兵不舉則禍必加是則朝廷激變之也
及燕之舉兵迄今兩月前後調兵者不下五十餘萬而
乃一夫無獲謂之國有謀臣可乎陛下不察臣愚以為
不待十年必有噬臍之悔矣伏願興滅繼絕釋齊王之
囚封湘王之墓還周王于京師迎楚蜀為周公俾其各
命世子持書勸燕以罷干戈以敦親戚天下不勝幸甚
疏上帝不能用 鎮守遼東江陰侯吳高與耿璿楊文
帥師圍永平 李景隆乘傳至德州收集耿炳文敗亡

將卒并調各路軍馬五十萬進營于河間燕王聞之呼
景隆小字曰李九江膏梁監子耳寡謀而驕色厲而餒
未常習兵見陣輒予以五十萬衆是自坑之也復聞景
隆軍中事燕王笑曰兵法有五敗景隆皆蹈之為將政
令不修上下異心一也北平早寒南卒裘葛不足披冒
霜雪又士無贏糧馬無宿藁二也不量險易深入趨利
三也貪而不治智信不足氣盈而愎仁勇俱無威令不
行三軍易撓四也部曲喧嘩金鼓無節好諛喜佞專任

小人五也九江五敗悉備保無能為然吾在此彼不敢至今往援永平彼知我出必來攻城回師擊之堅城在前大軍在後必成擒矣諸將曰北平兵少奈何王曰城中之衆以戰則不足以守則有餘兵出在外奇變隨用吾出非專為永平直欲誘九江來就擒耳吳高怯不能戰聞我來必走是我一舉解永平圍且破九江也遂行而誠世子居守曰景隆來堅守毋戰也士申燕軍援永平諸將請守盧溝橋王曰方欲使九江困于堅城之下

奈何拒之燕師猝至永平吳高不能軍退保山海關燕
兵奔之斬首數千級燕王曰高雖怯行事差密楊文勇
而無謀去高文不足慮也乃遣人貽二人書盛譽高而
詆文帝聞之削高爵徙廣西獨命文守遼東耿璠數請
攻永平以動北平不聽冬十月燕兵趨大寧初太祖
諸子燕王善戰寧王善謀洪武間燕王受命巡邊至大
寧與寧王相得甚歡大寧領朵顏諸衛多降人驍勇善
戰燕王既起兵謀取之而朝廷亦疑寧王與燕合削其

三護衛燕王聞喜曰此天贊我也取大寧必矣乃為書
貽寧王而陰率師兼程趨之諸將曰劉貞守松亭關急
未易破李景隆兵方盛不如還師救北平以為後圖燕
王曰今從劉家口徑趨大寧不數日可達大寧將士悉
聚松亭關其家屬在城皆老弱居守師至不日可拔城
破之日撫綏其家松亭之衆不降且潰矣北平深溝高
壘縱有百萬之衆未易以窺吾正欲其頓兵堅城之下
還兵擊之如拉朽耳諸公第從予行毋憂也乃自徑道

捲旆登山從後攻度闕至大寧克其西門獲都指揮房
寬殺卜萬于獄都指揮朱鑑戰死劉貞陳亨引軍還援
陳亨竟襲破貞率其衆降貞單騎負勅印走遼東浮海
歸京師大寧既拔燕王駐師城外遂單騎入城會寧王
執手大慟言北平旦夕且破非吾弟表奏吾死矣寧王
為草表謝請赦居數日情好甚洽燕王銳兵出伏城外
諸親密吏士稍稍得入城遂令陰結三衛渠長及閭左
思歸士皆喜定約燕王辭去寧王出餞郊外伏兵起執

寧王諸騎士卒一呼皆集遂擁寧王入關與俱西燕兵
既得朶顏諸衛兵益盛分遣薛祿下富峪會川寬河諸
處於是寧府妃妾世子皆攜其寶貨隨寧王還北平

李景隆聞燕兵攻大寧帥師進渡盧溝橋喜曰不守此
橋吾知其無能為矣遂薄城下築壘九門景隆攻麗正
門幾破城中婦女並乘城擲瓦礫景隆令不嚴驟退北
平守益堅景隆遣別將攻通州又結九營于鄭村壩親
督之以待燕王號令壘營人各為戰非受命不得輕動

遂攻燒順城門燕府儀賓李讓與燕將梁明等拒守甚
力世子嚴肅部署選勇士時時夜縋城砍營南軍擾亂
退營十里唯都督瞿能奮勇與其二子帥精騎千餘殺
入張掖門銳不可當後不繼乃勒兵以待景隆忌能成
功使人止之候大軍至俱進於是連夜汲水灌城天寒
冰結明日不得登燕王至會州簡閱將士立五軍命都
指揮張玉將中軍朱能將左軍李彬將右軍徐忠將前
軍房寬將後軍軍各置左右副將以大寧歸附之衆分

隸各軍 十一月庚午李景隆移營向河西先鋒都督
陳暉渡河而東燕王率兵至孤山列陣於白河西河水
難渡是日雪默禱曰天若助予則河水合是夜水果合
遂率師擊敗前哨都督陳暉兵暉衆跳冰遁冰乃解溺
死無算燕王見景隆兵動以奇兵左右夾擊遂連破七
營逼景隆營張玉等列陣而進至城下城中亦出兵內
外交攻景隆不能支宵遁翌日九壘猶固守北兵次第
破其四壘諸軍始聞景隆走乃棄兵糧晨夜南奔景隆

遂還德州燕諸將頻首賀王神筭王曰偶中耳諸君所言皆萬全策也都督火真焚敵驕以煖燕王鎧者趨焉楯人呵之王曰止是皆壯士景隆師既敗黃子澄等匿不以聞帝曰外間近傳軍不利果何如子澄曰聞交戰數勝但天寒士卒不堪今暫回德州待來春更進子澄遂遣人密語景隆隱其敗勿奏乙亥燕王上書自理以誅齊泰黃子澄傳檄天下十二月加李景隆太子太師景隆之敗子澄不以聞且云屯德州合各處軍馬

期以明年春大舉故有是命兼賜璽書金幣珍醢貂裘
燕王諭諸將曰李九江集衆德州將謀來春大舉我欲
誘之以敝其衆今帥師征大同大同告急景隆勢必來
援南卒脆弱苦寒之地疲于奔命凍餒逃散者必多善
戰者因其勢而利導之諸將曰善遂帥師出紫荆關攻
廣昌守將楊宗以城降 罷兵部尚書齊泰太常寺卿
黃子澄以燕王疏列二人罪也二人名雖罷退實籌畫
治兵如故 薊州鎮撫曾濬起兵攻北平不克死之河

北指揮張倫等率兩衛官軍自拔南歸曰矢死報國
叅贊軍務高巍上書言臣願使燕曉以禍福遂遣至燕
上書燕王曰太祖升遐皇上嗣位不意大王與朝廷有
隙張皇六師臣以為動干戈不若和解君臣之義大明
骨肉之親愈厚故願奉明詔置死度外親見大王昔周
公聞流言即避位居東若大王能割省計者送京師解去
護衛質所愛子孫釋骨肉猜忌之疑塞殘賊離間之口不
與周公比隆哉慮不及此遂檄遠邇大興甲兵襲疆宇

任事者得藉口以為殿下假誅左班文臣實欲效漢吳

王倡七國誅晁錯大王獲罪先帝矣今大王據北平取

密雲下永平襲雄縣掩真定數月以來尚不能出區區

最爾之地較以天下十五而未有一焉大王將士殆亦

疲矣大王同心之士大約不過三十萬大王與天子義

則君臣親則骨肉尚在離間以三十萬異姓之士可保

終身困迫死于殿下乎大王信臣言上表謝罪按甲休

兵天意順人心和太祖在天之靈亦安矣不然執迷不

回幸而兵勝得成後世公論謂何倘有蹉跌取譏萬世
於斯時也追復臣言可得乎書再上不報

二年春正月燕王進兵圍蔚州指揮王忠李遠以城降
遂進攻大同李景隆帥師救大同出紫荆關燕王由居
庸關入還北平景隆軍凍餒死者甚衆隨指者十二三
委棄鎧仗于道不可勝紀 二月韃靼率衆助燕 夏
四月朔李景隆會兵德州武定侯郭英安陸侯吳傑等進
兵真定以圖燕帝賜景隆斧鉞旌旄中官齎往忽風雨

舟壞沈于江復賜之景隆自德州進兵北伐軍過河間
前鋒將至白溝河郭英等過保定期于白溝河合勢同
進燕王率諸將進駐固安燕王謂丘福等曰李九江等
皆匹夫無能為惟恃其衆耳然衆豈可恃也人衆易亂
擊前則後不知擊左則右不應將帥不專政令不一甲
兵糧餉適足為吾資耳爾等但秣馬厲兵以待張玉請
先往駐白溝以逸待勞王從之命率衆先往既至三日
景隆前鋒都督平安至白溝河是日燕兵渡五馬河駐

營蕪家橋其夜大雨平地水深三尺燕王坐胡床待旦

忽見兵刃有火光如毬擊矍然上下金鐵錚錚作聲弓
弦皆鳴燕王喜曰此勝兆也帝慮景隆輕敵乃遣魏國
公徐輝祖帥京軍三萬為殿星馳會之己未李景隆及
郭英吳傑等合軍六十萬號百萬次于白溝河列陣以
待平安伏精兵萬騎邀擊燕王曰平安豎子從吾出塞
識吾用兵以故敢為先鋒今日吾先破之安驍勇善戰
鋒初交安奮矛率衆而前都督瞿能父子亦奮躍所向

披靡殺傷燕兵甚衆燕兵遂却燕有內官狗兒者亦敢
勇率千戶華聚力戰河北岸百戶谷允入陣得級七王
親率兵夾擊殺數千人都指揮何清被執時已暝戰猶
未已至夜深始各收軍還是日也兩軍互相殺傷安軍
哨馬失百餘匹而已景隆英傑藏火器地中人馬遇之
輒爛戰既解燕王從三騎殿後迷失道下馬伏地視河
流辨東西始知營壘所在倉猝渡河而北燕王既收軍
還營擢谷允指揮夜秣馬待戰使張玉將中軍朱能將

左軍陳亨將右軍為先鋒立福將騎兵繼之馬步十餘萬黎明燕軍畢渡瞿能率其子擣房寬陣平安翼之寬陣披靡擒斬數百人張玉等見寬敗有懼色王曰勝負常事耳彼兵雖衆不過日中保為諸君破之即麾精銳數千突入左掖高煦率張玉等軍齊進王先以七騎馳擊之且進且退如是者百餘合殺傷甚衆南軍飛矢如注射王馬凡三被創三易之所射矢三服皆盡乃提劍左右奮擊劍鋒折缺不堪擊馬却阻於隄幾為瞿能所

及燕王急走登隄伴麾鞭若招後繼者景隆疑有伏不敢上隄而燕王復率衆馳入陣斬其騎數人平安善用鎗刀所向無敵北將陳亨徐忠皆被創已而安斬亨於陣忠兩指被砍未斷自斷而擲之裂衣裹鎗而戰高煦見事急帥精騎數千前與王合高煦接戰彼此相持而王亦疲矣日薄午瞿能復引衆躍而前大呼滅燕斬其騎百餘人越雋侯俞通淵陸涼衛指揮滕聚復引衆赴之會旋風起折大將撻南軍相視而動王乃以勁騎繞

出其後突入馳擊輿高煦騎兵合殺瞿能父子於陣平安與朱能戰亦敗於是列陣大崩奔走之聲如雷通淵與聚等皆死燕兵追至其營乘風縱火燔其營壘郭英等潰而西李景隆潰而南委棄器械輜重山積斬首及溺死者十餘萬燕兵追至鞞山月漾橋殺溺蹂躪死者復數萬橫尸百餘里景隆單騎走德州其降軍燕王悉恩遣之南師間者皆解體是戰也魏國公徐輝祖帥軍為殿獨全軍而還壬戌燕王進攻德州 五月辛未李

景隆自德州奔濟南燕兵遂入德州籍吏民收府庫獲糧百餘萬自是兵食益饒哨騎至濟陽縣執教諭王省既而釋之省還陞明倫堂集諸生曰此堂明倫今日君臣之義何在遂大哭諸生亦哭以頭觸柱而死先是山東叅政鐵鉉方督餉赴景隆軍會景隆師潰東奔次臨邑諸城堡皆望風瓦解鉉與叅軍高魏酌酒同盟收集潰亡守濟南相與慷慨涕泣以死自誓及景隆奔就鉉燕王令諸將乘勝倍道而進庚辰至濟南景隆衆尚十

餘萬倉猝出戰布陣未定燕王帥精騎馳擊之景隆復大敗單騎走於是燕兵列陣圍之鉉督衆悉力捍禦事聞乃陞鉉為山東布政司使召李景隆還以左都督盛庸為大將軍右都督陳暉副之景隆還朝帝赦不誅黃子澄痛哭曰景隆出師觀望懷二心不亟誅何以謝宗社勵將士副都御史練子寧執而數之朝以哭請卒不問燕王圍濟南久令人射書城中促降有儒生高賢寧在城中乃作周公輔成王論請罷兵不報燕王圍濟南

已三月不下乃堰城外諸溪澗水灌城城中人大懼鉉
曰無恐計且破之不三日遁矣鉉乃議令軍中詐降迎
燕王入約壯士懸鐵板伏城上閼王且入則下鐵板拔
橋計定使守陴之卒晝夜哭曰濟南魚矣亡無日矣乃
撤守具出居民伏地請曰奸臣不忠使大王冒霜露為
社稷憂誰非高皇帝子誰非高皇帝臣民其降也然東
海之民不習兵革見大軍壓境不識大王安天下子元
元之意或謂聚而殲之請大王退師十里單騎入城臣

等具壺漿而迎燕王大喜時王苦兵間謂濟南降即不
得金陵可斷南北畫中原自守亟下令退軍王乘駿馬
徐行張蓋率勁騎數人渡橋直至城下城門開守陴者
皆登城伏堵間燕王比入門門中人呼千歲鐵板亟下
傷燕王馬首王驚易馬而馳濟南人挽橋橋則堅燕王
竟從橋逸去復合兵圍濟南鉉令守陴罵燕王大怒乃
以駭擊城垂破鉉書高皇帝神牌懸城上燕兵不敢擊
鉉每出不意募壯士突擊燕兵破之燕王憤甚計無所

出僧道衍進曰師老矣請暫還北平以圖後舉於是撤圍還北平鉉及盛庸等兵乘勢追之遂復德州兵勢大振上即軍中擢鉉為兵部尚書贊理大將軍軍事封盛庸為歷城侯 九月朔詔大將軍盛庸總平燕諸軍北伐副將軍吳傑進兵定州都督徐凱等屯滄州 宋參軍說鉉曰濟南天下之中北兵南來其留守者類老弱且永平保定雖叛諸郡堅守者實多郭布政輩書生公能出奇兵陸行抵真定南朝諸將潰逸者稍稍收合不數

日可至北平其間豪傑有聞義而起者公便宜部署號召招徠之北平可破也北兵回顧家室必散歸徐沛間素稱驍勇公檄諸守臣倡義集勇候北兵歸台南兵往進者晝夜躡之公館穀北平休養士馬迎其至擊之彼腹背受敵大難旦夕平耳鉉以軍餉盡于德州城守五月士卒困甚而南將皆駑材無足恃莫若固守濟南牽率北兵使江淮有備北兵不能越淮歸必道濟吾邀而擊之以逸待勞全勝計也乃設宴天心水面亭搗問辛

苦激發忠義 冬十月燕王聞盛庸兵北向欲出兵攻
滄州恐南師為備乃陽下令征遼東諸將士聞之不樂
至通州張玉朱能請曰今密邇大敵而勤師遠征遼地
寒早士卒不堪恐非利也燕王屏左右語之故曰今盛
庸駐師德州吳傑平安守定州徐凱陶銘築滄州相犄
角為吾梗德州城壁堅且敵衆所聚定州修築已完城
守亦備皆難猝下獨滄州土城潰圯日久天寒地凍雨
雪泥淖築城不易我乘其未備急趨攻之必有土崩之

勢今佯言往征遼東因其懈怠偃旗捲甲由間道直擣城下破之必矣王與能頓首稱善徐凱諜知北兵征遼東不為備遣兵四出伐木晝夜築城燕師至天津過直沽王語諸將曰彼所備者惟青縣長蘆今埽埽竈兒等坡無水彼不為備由此可徑至滄州城下乃下令軍士循河而南軍士疑曰征東何南也王曰夜有白氣二道自東北指西南占曰利南乃自直沽一晝夜疾行三百里遇偵騎盡殺之比曉至滄州凱猶不知督眾運土築

城如故兵至城下乃覺亟命分守城堞衆皆股栗不能
甲燕兵四面急攻之玉帥壯士由城東北隅肉薄而登
遂拔其城先遣兵斷歸路生擒凱及都督程暹都指揮
俞琪趙許胡原等斬首萬餘級餘衆悉降燕將譚淵盡
坑殺之械凱等至北平 十二月燕王移直沽之舟至
長蘆載降獲輜重順流而北王自率衆循河而南盛庸
出兵襲後不克燕王遂至臨清移屯館陶掠大名焚軍
餉甲午燕王至汶上掠濟寧盛庸鐵鉉率兵躡其後營

于東昌先鋒將孫霖營滑口燕將朱榮劉江襲破霖軍
都指揮唐禮被執霖走乙卯燕師至東昌庸與鉉等聞
燕兵且至宰牛宴犒將士誓師勵衆簡閱精銳背城而
陣具列火器毒弩以待時燕軍屢勝見庸軍即鼓譟前
薄盡為火器所傷會平安兵至與庸軍合於是庸麾兵
大戰燕王以精騎衝左掖入中堅庸軍厚集團燕王數
重燕王自衝擊不得出朱能周長率番騎奮擊東北角
庸等撤西南兵往禦圍稍緩能衝入奮力死戰異燕王

出張玉不知王已出突入陣救之没于陣庸軍乘勝擒斬萬餘人燕兵大敗遂北奔庸趣兵追之復擊殺者無算是役也燕王數危甚諸將奉帝詔莫敢加刃燕王亦知之故挺身出輒短兵接戰王騎射尤精追者每為所殺至是奔北獨以一騎殿後追者數百人不敢迫適高煦領指揮華聚等至擊退庸兵獲部將數人而去燕王喜以煦肖已慰勞之薛祿亦數擊退南兵燕王聞張王敗歿乃痛哭曰勝負常事不足慮艱難之際失此良輔

殊可悲恨師還與諸將語每及東昌事曰自失張玉吾
至今寢食不安遂涕下不已諸將皆泣後舉報功之典
謂侍臣曰論靖難功當以張玉為第一追封榮國公河
間王

三年春正月辛酉朔東昌捷至詔褒賞將士召齊泰黃
子澄還朝仍預軍事享太廟告東昌之捷初燕王師
出僧道衍曰師行必克但費兩日耳及自東昌還道衍
曰兩日昌也自此全勝矣二月燕王自撰文流涕祭

陣亡將士張王等脫所服袍焚之以衣亡者曰雖其一絲以識余心將士家父兄弟見之皆感泣燕王因激勸將吏召募勇敢以圖進取乙未帥師南出進諸將士諭曰爾等懷忠奮勇每戰必勝可謂難矣比者東昌之役接戰即退遂棄前功夫懼死者必死捐生者必生白溝河之戰南軍先走故得而殺之所謂懼死者必死也爾等奮不顧身故能出萬死全一生所謂捐生者必生也自今無輕敵無選悞違者殺無赦已酉師至保定威

庸合諸軍二十萬駐德州吳傑平安出真定燕王與諸將議所向丘福等言定州府民新集城池未固攻之可拔王曰野戰易攻城難今盛庸聚德州吳傑平安駐真定相為犄角攻城未拔頓師城下必合勢來援堅城在前強敵在後勝負未可決也今真定相距德州二百餘里我軍界其中敵必出迎戰取其一軍餘自膽破諸將曰軍介兩敵使彼合勢夾攻吾腹背受敵奈何王曰百里之外勢不相及兩軍相薄勝敗在呼吸間雖百步不

能相救況二百里哉明日遂移軍東出三月朔師次
滹沱河遣遊騎哨定州真定多為疑兵誤之諜報盛庸
軍夾河為營平安駐師單家橋燕兵由陳家渡過河逆
之相距四十里辛巳盛庸軍及燕兵遇于夾河燕王以
三騎覘庸陣庸結陣甚堅陣旁火車大銃強弩齊列王
掠陣過庸遣騎追皆射却之乃以步騎萬餘薄庸陣攻
其左掖庸軍擁盾自蔽矢刃不能入燕軍預作長檣約
六七尺橫貫鑲釘于端釘末有逆鈎令勇士直前擲之

直貫其盾亟不得出動則牽連乘隙急攻之庸軍棄盾走燕兵蹂陣而入南軍奔潰燕將譚淵從軍中望見塵起遽出兵逆擊之莊得帥衆死戰淵與其部下指揮董中峯皆為得軍所殺朱能張輔率衆並進王自以勁騎繞出南軍背貫陣前出與能軍合庸軍火器不及發遂却都指揮莊得陷陣沒驍將楚智被執不屈死之張皂旗亦戰死張皂旗者常以皂旗先登燕軍畏之呼皂旗張及死猶執皂旗不仆是日戰酣迫暮皆歛兵入營燕

王以十餘騎迫庸營野宿天明見四面皆庸兵左右請
亟去燕王曰毋恐日出乃引馬鳴角穿敵營從容去諸
將相顧莫敢發一天燕王既還營復嚴陣約戰謂諸將
曰昨日譚淵逆擊太早故不能成功彼雖少挫尚銳必
欲絕其生路安得不致死我也今日爾等嚴陣戰我以
精騎往來陣間敵有可乘之隙即入擊之兩陣相當將
勇者勝此光武之所以破王尋也壬午復戰庸軍西南
燕軍東北燕王臨陣督戰張竒兵往來衝擊自辰至未

兩軍互勝負屢退屢進將士皆疲各坐息少頃復起戰
相持不決忽東北風大起塵埃漲天沙礫擊面兩軍睜
目咫尺不見人北軍乘風大呼縱左右翼橫擊之鉦鼓
之聲振地庸軍大敗棄兵走燕兵追至滹沱河踐溺死
者不可勝計降者燕王悉縱遣之盛庸走德州當是時
盛庸恃東昌之捷輕敵將士咸攜金銀扣器錦繡衣袍
曰破北平張筵痛飲至是盡為燕兵所獲燕王戰罷還
營塵土滿面諸將不能識聞語聲始趨進見詔竄逐

齊泰黃子澄于外令有司籍其家以謝燕人有司奉行
徒為具文實使出外募兵也 閏三月己亥吳傑等自
真定引軍出欲與盛庸軍合未至八十里聞庸敗復還
真定燕王語諸將曰吳傑若嬰城固守為上策若軍出
即歸避我不戰是謂中策若來求戰則下策也我料其
將出下策破之必矣乃下令軍士出取糧戒勿遠故令
校尉荷擔抱嬰兒佯作避兵狀奔入真定報云燕軍各
散出糧營中無備傑等信之乃謀輕師掩不備遂出軍

潯沱河距燕軍七十里燕王聞之大喜薄暮趣兵渡河
諸將請俟明旦王曰機不可失也稍緩之彼退守真定
城堅糧足攻之難矣遂進王先策馬渡河河水深麾騎
兵由上流並渡過水令淺輜重步卒得由下流畢渡循
河行二十里與傑軍遇于藁城會日暮燕王恐傑軍遁
去親率數十騎逼敵營宿以綴之明日吳傑等列方陣
于西南以待燕王謂諸將曰方陣四面受敵豈能取勝
我以精兵攻其一隅一隅敗則其餘自潰矣乃以軍糜

其三面而親帥精銳攻東北隅大戰右軍稍却薛祿馳赴奮擊出入敵陣馬蹶為南軍所執奪敵刀斬數人復跳而免督戰益力燕王親率驍騎循滹沱河繞出陣後突入大呼奮擊南軍矢下如雨集王所建旗如蝟毛焉燕師多被殺傷平安於陣中縛高樓上可數丈登以望燕軍燕王以精騎衝之將及樓平安墜而走會大風起發屋拔樹燕軍乘之傑等師大潰燕王麾兵四向蹙之斬首六萬餘級追奔至真定城下又擒其驍將鄧馱陳

鵬等盡獲軍資器械吳傑平安走入城南兵降于燕燕
王悉釋之南還王遣使送所建旗還北平諭世子曰善
藏之使後世勿忘也燕兵自白溝河至藁城三捷皆有
風助之 癸丑燕兵掠順德廣平河北郡縣多降 夏
四月燕兵次于大名大名官吏迎燕兵諜者言齊泰黃
子澄皆竄逐有司已簿錄其家王乃上書稱臣燕王棣
大畧言齊黃剪削宗藩欲加死地故以兵自防誠不得
已大軍之至每自推衄臣不敢為喜輒用傷悼比聞齊

秦黃子澄皆已竄逐臣一家喜有更生之慶而將士皆曰
恐非誠心姑以餌我不然吳傑平安盛庸之衆當悉召
還而今猶集境上是奸臣雖出而其計實行臣思其言
恐亦人事或然也故不敢遽釋兵惟陛下斷而行之毋
為奸邪所蔽書上帝以示方孝孺及侍中黃觀孝孺對
曰諸軍大集燕兵久羈大名暑雨為沴不戰自罷急令
遼東諸將入山海關攻永平真定諸將渡盧溝橋擣北
平彼顧巢穴歸援我以大軍躡其後必成擒矣今宜且

與報書往返踰日彼心解而衆離我謀定而勢合機不
可失也帝曰善命孝孺草詔赦燕王父子及諸將士罪
使歸本國勿預兵政仍復王爵永為藩輔遣大理少卿
薛嵩齎往燕師又為榜諭數千言授嵩令至燕軍中密
散諸將士嵩遂齎詔至燕軍燕王讀之怒問嵩臨行上
何言嵩曰上言殿下旦釋甲謁孝陵暮即旋師燕王曰
噫是不可給三尺兒而指侍衛將士曰有丈夫者嵩惶
恐不能對諸將盡譁請殺嵩王曰奸臣不過數人嵩天

子命使毋妄言。品戰慄流汗被體。燕王乃耀武令各軍連營百餘里。戈甲旗鼓相接而馳射。其中使品觀之。留數日。遣中使送出境。語之曰：歸為老臣謝天子。天子于臣至親。臣父天子大父。天子父臣同產兄。臣為藩王富貴已極。復何望。天子素愛厚臣。一旦為權奸讒構。以至於此。臣不得已為救死計耳。幸蒙詔罷兵。臣一家不勝感戴。但奸臣尚在大軍未還。臣將士存心狐疑。未肯遽散。望皇上誅權奸散天下兵。臣父子單騎歸闕下。唯陛

下命之崑歸至京方孝孺私就問燕事崑具以告且曰

燕王語直而意誠又言其將士同心南師雖衆驕情寡

謀未見可勝孝孺默然崑入見帝亦備述前意帝語孝

孺曰誠如崑言曲在朝廷齊黃誤我矣孝孺惡之曰此

為燕游說也五月燕師駐大名吳傑平安發兵斷北

平餉道燕王遣指揮武勝復奏書于朝大畧言朝廷許

罷兵而盛庸等攻北絕糧餉與詔旨背馳帝得書有罷

兵意以示方孝孺曰此孝康皇帝同產弟朕叔父也吾

他日不見宗廟神靈乎孝孺曰陛下果欲罷兵耶即兵一罷散不可復聚彼長驅犯闕何以禦之今軍聲大振計捷書當不遠願陛下毋惑甘言上然之縛勝下錦衣獄燕王聞怒曰俟命三月今武勝見執是其志不可回矣彼軍駐德州資糧所給皆道徐沛以輕騎數十邀焚之德州必困若來求戰吾嚴師待之以逸待勞可必勝諸將皆曰善乃遣都指揮李遠等帥輕騎六千詣徐沛令易士卒甲冑與南師同插柳枝于背為識遠等至濟

寧穀亭盡焚軍興以來儲積丘福薛祿合兵攻濟州塞
濠登陴破其城遂潛兵掠抄沙河沛縣南軍不之覺糧
船數萬艘糧數百萬悉為所焚軍資器械俱為煨燼河
水盡熱漕運軍士散走京師大震德州糧餉遂艱李遠
率兵還盛庸遣將袁宇以三萬人邀遠軍遠設伏擊敗
之斬首萬餘級 秋七月燕兵襲彰德時都督趙清守
彰德燕王遣數騎日往來城下擾其樵採清遣兵追之
則引而去於是城中之薪拆屋而炊既而王令伏兵城

傍山麓仍遣數騎至城下誘之清果遣兵出入伏擒殺
千餘人南軍據尾尖寨梗餉道險隘難下燕王遣張禮
間道夜襲擊下之乃使人招清清對使者言殿下至京
城日但以二指許帖召臣臣不敢不至今未敢也王悅
其言為之緩攻 平安自真定率兵攻北平營于平村
離城五十里擾其耕牧燕世子督衆固守遣人如燕王
軍告急燕軍還次定州聞北平被圍王召劉江問策將
安出江慷慨請行且曰臣方思之高煦請與江先往江

曰此不可疲于奔命徒為敵笑耳俄而曰臣策成矣王
喜呼酒送其行江與王約曰臣至北平以砲響為號二
次砲響則決圍三次砲響則進城若不聞第三砲則臣
戰死矣臣若入城中既聞外間救至則守城軍士勇氣
自倍宜令軍士人帶十砲為殿者放砲常不絕聲則遠
近皆謂大軍既來平保兒必駭散矣保兒安小字也王
大喜然其計江乃率兵渡滹沱河由間道行張旗幟夜
多舉火炬至則與安戰果如其策大敗之斬獲數千人

安還走真定方孝孺門人林嘉猷嘗居北平邸中知

高煦高燧弗恭于燕世子中官黃儼素奸險儼方曲事

高燧高燧與世子協守北平高煦從燕王軍時時傾世

子而是時河北師老無功德州餉道絕孝孺乃言於上

曰兵家貴間燕父子兄弟可間而離也世子誠見疑王

必北歸王歸而我餉道通事乃可濟上善之立命孝孺

草書遣錦衣衛千戶張安如燕貽世子令歸朝廷許以

王燕世子得書不啟封遣人并安等送軍前中官黃儼

者比書至北平則已先使人馳報燕王曰世子且反王
疑之問高煦高煦曰世子固善太孫語未竟世子所遣
使以書及張安至燕王啟視遽曰嗟乎幾殺吾子乃囚
安等盛庸等檄大同守將房昭引兵入紫荆關畧保
定諸縣駐兵易州西水寨寨在萬山中昭欲據險為持
久計窺北平燕王在大名聞之曰保定股肱郡保定失
即北平危矣豈可不援遂下令班師八月師北渡漳
沱河至完縣諸山寨民來附悉慰遣之令孟善鎮保定

謀報吳傑遣都指揮韋諒以兵萬餘轉餉房昭軍燕王
曰昭據西水寨寨所乏糧耳使真定餽餉入昭得固守
未易拔也率精騎三萬邀擊破之又命朱榮等以兵五
千圍定州燕王曰我圍房昭寨急真定必來援然摧敗
之餘進必不銳我姑輕騎往定州彼聞必速來來則據
險以待我還兵合擊必敗之援兵敗寨可不攻下也時
圍寨久寨軍多南人天寒衣薄會夜霜月燕王令四面
皆吳歌南軍聞之多淚下有潛下寨降者十月真定援

兵果至燕王自定州還與圍寨兵合擊南兵於齊眉山
下令勇士捲旆登山潛出陣後張旗幟寨中望見大駭
與真定兵俱潰斬首萬餘級墜崖死者甚衆獲其將花
英鄭琦王恭詹忠等惟房昭韋諒走免遂破西水寨還
師北平十一月遣駙馬都尉梅殷鎮守淮安殷尚太
祖女寧國公主有才智太祖特眷注之臨崩帝與殷侍
側受顧命太祖謂帝曰燕王不可忽顧語殷曰汝老成
忠信可託幼主出誓書及遺詔授之曰敢有違天者為

朕伐之言訖崩至是燕兵漸逼諸將多選懦觀望乃召募淮南兵民合軍士號四十萬命殷統之駐淮上以阮燕師既而燕王遣殷書以進香金陵為辭殷答曰進香皇考有禁遵者為孝不遵者不孝割使者耳鼻口授數語詞甚峻王怒遠東守將楊文與王雄等引兵圍永平畧薊州遵化諸郡縣燕王遣劉江率衆趨永平命江曰爾至永平敵必遁歸山海勿追之但聲言還歸北平既出則以夜捲旗囊甲復入永平城中楊文聞爾還北

平復來爾速出擊之必大獲江如言果敗文兵于昌黎
殺數千人獲將士王雄等燕王還北平悉縱遣之仍令
歸諭楊文等時燕王起兵三年所得止永平大寧保定
旋得旋棄戰死者甚多南軍分布頗盛時時告捷廷議
多謂燕出沒勞苦軍少不足慮帝又御內臣甚嚴皆怨
望遂密謀戴燕王告以金陵空虛宜乘間疾進王亦太
息曰頻年用兵何時可已政當臨江一決不復返顧矣
於是踰城不攻決計趨金陵 十二月燕師出北平駐

軍蠡縣復移營汧河命李遠率輕兵前哨

四年春正月命魏國公徐輝祖率京軍往援山東燕李
遠兵至藁城遇德州裨將葛進領馬步萬餘為前鋒乘
冰渡滹沱河半渡遠進擊之進望見遠兵少斂退繫馬
林間以步卒來戰遠佯却進來追遠分兵潛出其後解
縱所繫馬前軍奮擊之進軍退失馬遂大敗斬首四千
餘級進僅以身免燕將朱能率輕騎千人哨至衡水遇
都督平安遣兵復通州能擊之斬首七百餘級生擒部

將賈榮等燕王乃以師由館陶渡見一病卒仆道傍王
命左右以從馬載之曰壯士為我也聞者感泣進攻東
阿破之指揮詹璟被執吏目鄭華死之攻汶上都指揮
薛鵬被執師至沛縣知縣顏伯瑋知勢不敵遣縣丞胡
先詣徐州告急預送其子有為出走令還告其父母云
子職弗能盡矣賦詩書公署壁間夜二鼓師至東門指
揮王顯以城降師遂入伯瑋衣冠南向再拜慟哭曰臣
無以報國乃自縊死子有為不忍去復還自剄以從無

何將士擒主簿唐子清典史黃謙至皆死之胡先還收
伯瑋父子屍葬之城南沛縣既破燕師遂向徐淮燕王
久不見南師出遣番騎指揮款台帥十二騎前覘至鄒
縣遇南師轉餉卒三千人款台大呼馳入其陣曰燕王
大軍至矣轉餉卒驚潰擒千戶二人歸燕王曰款台以
十二騎破三千人真壯士命左右錄其功遂進師徐州
守將閉城不出燕王欲驅兵南進而士卒多散出取糧
恐後至者為城中兵所掩乃伏兵九里山又先匿百餘

騎演武亭令數騎往來城下誘之城出兵不出乃嫚罵
焚其廬舍徐發一矢射城上抵暮乃去明日復如之城
中不勝怒乃開門以兵五千出追所遣騎按轡徐行既
渡河砲舉伏發燕王親率勁騎馳西門斷其歸路腹背
夾擊之城出兵大潰爭渡橋橋壞溺死千餘人斬首數
千級餘皆奔入城後單騎往來城下城中兵竟不敢出
乃以師南行三月師趨宿州燕王謂諸將曰敵綴我
當備之乃留都指揮金銘將游騎百人哨其後戒之曰

敵至見爾孤軍必追襲爾列隊徐行彼疑爾為誘必不敢進吾令都指揮冀英先以數騎伏河南覘爾渡河如敵來追即舉砲敵疑有伏猶豫未決爾師畢渡矣銘往果遇南軍萬餘徐行臨河南軍來追冀英連舉砲南軍即斂退銘遂得渡河與燕王會宿州乃進兵蒙城渦河等處平安率馬步兵四萬躡燕軍燕王曰此濱河多林木彼必疑有伏淝河地平無樹彼不疑可伏兵遂親率騎二萬持三日糧至淝河按伏勅諸軍皆束炬相屬於

道戒之曰俟與敵戰則舉火一炬舉餘炬皆應敵見舉
炬火多必驚潰按兵數日敵不至糧且盡諸將請還師
燕王曰彼遠來銳氣求戰肯委之而去耶但一敗其前
鋒彼自奪氣姑按甲待之時迫暮令番騎指揮款台以
數騎往哨去南營四十里聞其更鼓還報南軍旦必至
王喜命王真劉江各將百騎往逆之戒以緣路按伏遇
敵誘入伏與戰又令王真束草置囊中如束帛狀載馬
上南軍來追擲於地使往取亂之真等進與安軍遇相

接戰南軍追至擲囊餌之南軍競往取囊陣稍亂又入
伏內伏發南軍還走燕王率兵至平安以三千騎走北
岸燕王以數十騎當之平安裨將火耳灰者故燕番騎
指揮素驍勇被召入京師遂隸平安麾下持稍直犯燕
王相距十步許燕王令胡騎指揮童信射其馬蹶遂獲
火耳灰者其步曲哈三帖木耳亦勇見火耳灰者被獲
持稍突陣亦射擒之平安易服以數騎走燕王率兵追
之南軍大敗驍將林帖木兒等被執平安退屯宿州是

日釋火耳灰者令入宿衛諸將以為言不聽燕兵破蕭縣知縣陳恕死之燕王以師向臨淮諭將士曰我師利在速戰敵駐宿州為持久計若斷其糧餉彼不攻自潰矣乃遣譚清帥兵至徐州擊轉餉兵大破之南至淮河又燒餉舟甚衆清還南軍圍之燕王見清旗幟亟馳往援鐵鉉來戰燕軍不利却王馳入陣火耳灰者翼之殺南軍數十人南軍披靡欲南遁燕王常以騎兵綴之又遣陳文李遠哨淮河擊敗守淮兵數千人夏四月平安營於小河燕兵據河北燕王令

陳文扼要處為橋先渡步卒輜重騎兵隨之遂分兵守橋
明日總兵何福列陣十餘里張左右翼緣河而東燕王帥
騎兵戰福麾步兵而前爭所守橋福率後軍來援奮擊破
之俘獲數百人遂斬陳文于陣平安轉戰圍王真數重真
身被十餘創自刎馬上平安遇王于北坂王急幾為安
槊所及馬蹶不得前燕番騎指揮王騏躍馬入陣援燕
王得脫南軍奪橋而北勇氣百倍燕將張武率勇敢士
自林間突出與王騎合擊却之指揮丁良朱彬被執燕

將都指揮韓貴亦戰死於是南軍駐橋南北軍駐橋北
相持者數日南軍糧盡採蕪而食燕王曰南軍饑更一
二日饑稍集未易破也乃留兵千餘守橋而潛移諸軍
輜重去南營三十里夜半渡兵而南繞出其後比旦始
覺時徐輝祖軍至甲戌大戰齊眉山自午至酉勝負相
當蔚州衛千戶李斌馬蹶為南軍所擒猶力斬數人乃
死是時南軍再捷王真陳文李斌皆驍將敗沒燕諸將
皆懼說燕王曰軍深入矣暑雨連綿淮土蒸濕且疾疫

小河之東平野多牛羊二麥將熟若渡河擇地休息士馬觀釁而動可持久也燕王曰兵事有進無退勝形成矣而復北渡士不解體乎公等所見拘攣耳下令曰欲渡河者左不欲渡河者右諸將多趨左王怒曰公等自為之朱能曰諸君勉矣漢高十戰而九不勝卒有天下豈可有退心燕王不解甲者數日南軍相慶時廷臣有曰燕且北矣京師不可無良將帝因召輝祖還何福軍聲遂孤時南軍所至掘塹作壘為營軍士通夕不得休

暨成而將旦復行往往虛敵人力故臨陣之際卒先罷
困燕王行營不為塹壘但分布隊伍列陣為門敵不敢
犯故將士至營即得休息自便暇則射獵周覽地勢得
禽輒頒將士每拔破壘悉以所獲財物賚之人樂為用
至是對壘日久諜報南師糧運且至燕王語諸將曰敵
慮我擾必分兵護之乘其兵分勢弱必不能支遂遣朱
榮劉江等率輕騎截南軍餉道又令游騎擾其樵採何
福乃下令移營靈壁就糧時南軍運糧五萬平安帥馬

步六萬護之使負糧者居中燕王覘知之分壯士萬人遮援兵而令高煦伏兵於林間戒伺敵戰疲即出擊於是躬率師逆戰以騎兵為兩翼安引軍突至殺燕兵千餘矢下如雨王麾步軍縱擊橫貫其陣斷而為二南軍遂亂何福等出壁與安合擊殺燕兵數千却之高煦窺見南師罷即帥衆自林間突出王還兵掩擊其後福等大敗殺傷萬餘人喪馬三千餘匹燕師盡獲其糧餉福等以餘衆入營塞壘門堅守是夜福下令期明旦聞砲

聲三即突圍出師就糧于淮河庚辰燕軍攻靈璧營王躬率諸將先登軍士蟻附而上燕兵三震砲福軍誤為已砲急趨門門塞不得出營中紛擾人馬壅濠塹皆滿燕兵急擊之遂破其營指揮宋垣力戰死何福遁走副總兵陳暉平安叅將都督馬溥徐真都指揮孫晟王貴等皆被執叅贊軍務禮部侍郎陳性善大理寺丞彭與明皆死之平安被俘見王曰淝河之戰公馬不躡何以遇我安大言曰刺殿下如拉朽耳王太息曰高皇帝好

養壯士釋之遣還北平自是南軍益衰矣黃子澄聞之撫膺大慟曰大事去矣吾輩萬死不足贖誤國之罪是月上用齊泰黃子澄謀調遼兵十萬至濟南與鐵鉉合以絕燕兵後總兵楊文至直沽遇燕將宋貴截殺師潰文被執竟無一人至濟南者五月燕兵至泗州守將周景初舉城降燕燕王謁祖陵泣曰橫羅權奸幾不免矣幸賴祖宗得今日拜陵下陵下父老來見悉賜牛酒慰勞遣之師抵淮盛庸領馬步兵數萬戰艦數千列淮

之南岸燕兵列北岸相對燕王命艤舟編筏揚旗鼓噪
指麾若將渡者南軍望之有懼色潛遣丘福朱能狗兒
等將驍勇數百西行二十里以小舟潛濟南軍不之覺
也及漸近營舉砲南軍駭愕福等前奔之南軍棄甲走
庸股栗不能上馬其下掖之登舟單舸脫去北兵盡獲
其戰艦遂濟淮駐南岸是日攻下盱眙燕王乃會諸將議
所向或欲先取鳳陽遏其援兵乃以兵趨滁和集舟渡江
別遣一軍西擣廬州出安慶據長江之險或欲以淮揚

為根本次取高郵通泰以及真揚遂可渡江無後顧憂
燕王曰鳳陽城守固非盡力攻取不易下恐震驚皇陵
淮安高城深池兵強糧足若攻之不拔曠日持久援兵
四集力屈形見非我之利今宜乘勝直趨揚州指儀真
兩城勢單弱兵至可招之而下既得真揚則淮安鳳陽
人心自懈我聚舟渡江久則必有內變諸將皆頓首稱
善遂以師趨揚州遣使吳王招諭守將王禮先是禮聞
燕師至謀舉城降時監察御史王彬巡江淮治揚州

倚任指揮崇剛練兵繕濬城濠晝夜不解甲與彬共守揚州城禮既有異謀彬與剛知之執禮及其黨繫獄有力士能舉千斤彬常以自隨燕兵飛書城中有縛王御史降者官三品左右憚力士莫敢縛禮弟宗者厚誘力士母呼其子出會彬解甲浴盤中為千戶徐政張勝所縛遂出禮于獄開門降庚子燕兵至天長禮等縛二人以獻不屈皆死燕王遂至揚州命禮同指揮吳庸等諭下高郵通泰諸城并集舟以備渡江燕兵至高郵指揮

王傑降遂克儀真立大營于高資港儀真既破北舟
往來江上旗鼓蔽天京師聞北兵漸近益危懼遣侍中
許觀修撰王叔英募兵廣德諸郡都御史練子寧募兵
杭州燕王駐師江北朝廷六卿大臣多為自全計求出
守城都城空虛帝下詔罪已遣使四出徵勤王兵方孝
孺曰事急矣宜以計緩之遣人許割地稽延數日東南
募兵當至長江天塹北兵不閑舟楫相與決戰於江上
勝敗未可知帝從之乃以呂太后命遣慶城郡主如燕

師議和以割地分南北為請郡主燕王從姊也燕王見
郡主哭郡主亦哭燕王問周齊二王安在郡主言周王
召還未復爵齊王仍拘囚燕王益悲不自勝郡主徐申
割地議燕王曰凡所以來為奸臣耳皇考所分吾地且
不能保何望割也但得奸臣之後謁孝陵朝天子求復
典章之舊免諸王之罪即還北平祇奉藩輔豈有他望
此議蓋奸臣欲緩我師俟遠方兵至耳郡主默然辭歸
燕王送之出曰為我謝天子吾與上至親相愛無他意

幸不終為奸臣所惑更為我語諸弟妹吾幾不免賴宗廟神靈得至此相見有日矣郡主還具言之帝出語方孝孺且問曰今奈何孝孺曰長江可當百萬兵江北船已遣人燒盡北師豈能飛渡寧波知府王璉永清典史周縉募兵勤王六月癸丑朔燕王命都指揮吳庸集高郵通泰船于瓜州命內官狗兒狗兒後賜名彥回領都指揮華聚為前哨兵至浦子口盛庸諸將逆戰敗之燕王欲且議和北還會高煦引北騎至王大喜遽起按甲仗

鉞撫煦背曰勉之世子多疾於是煦殊死戰燕王率精騎直衝庸陣庸軍小卻朝廷大臣多遣使來燕軍獻渡江及入京城策者帝方遣都督僉事陳瑄率舟師往援庸瑄乃降燕時兵部侍郎陳植督師江上麾下謀迎降金都督首欲叛去植以大義責之遂為所殺金率眾降燕且邀賞燕王立誅之具棺斂植遣官護葬于白石山乙卯陳瑄具舟至江上來迎燕王乃祭大江之神誓師渡江舳艫相銜旌旗蔽空金鼓大震微風輕颺長江不

波盛庸所駐海艘列兵沿江上下二百里皆大驚愕師漸近岸庸等整衆以禦燕王麾諸將鼓譟先登以精騎數百衝庸軍庸師潰追奔數十里庸單騎遁餘將士皆解甲降諸將請徑薄京城燕王曰鎮江咽喉之地若城守不下往來非便先下鎮江則彼勢益危矣乃令來降海舟懸黃幟往來江中鎮江城望見驚曰海舟皆已降吾將何為其守將童俊遂率衆降帝聞江上海舟暨鎮江皆降甚憂鬱徘徊殿廷間召方孝孺問計孝孺即

班中執李景隆請誅之曰壞陛下事者此賊也羣臣鄒公瑾等十八人即殿前毆景隆幾死請亟加誅不聽孝孺曰城中尚有勁兵二十萬城高池深糧食充足盡撤城外居民驅入城城外積木皆令民運入彼無所據其能久駐乎帝從之下令軍民商賈晝夜撤屋運木盛暑中饑渴勞苦死者相枕藉民憚于運木多自縱火焚其居火連日不息西南城崩役兵民修築未竟東北復崩民晝夜不得息方孝孺請令諸王分守城門乃命谷王

撫安王楹分守都城門遣李景隆及兵部尚書茹瑺都督王佐往龍潭仍以割地講和為辭觀虛實以待援兵景隆瑺至龍潭見燕王伏地叩頭而已燕王笑曰勤勞公等至此有言乎景隆等惶恐叩頭稍稍及割地事燕王曰公等說客耶始吾未有過舉輒加之大罪削為庶人云大義滅親吾今救死不暇何用地為且今割地何名皇考裂土分封吾故有地矣此又奸臣計也凡所以來欲得奸臣耳公等歸奏上但奸臣至吾即解甲謝罪闕

下謁孝陵歸奉北藩永祗臣節天地神明在上景隆瑞
還報命帝令景隆再如師言罪人已竄逐候執至來獻
景隆趨起帝令諸王與偕既至燕王見諸王相勞苦諸王
具述帝意燕王曰諸弟試謂斯言誠偽諸王曰大兄洞
見矣燕王曰吾來但欲得奸臣耳不知其他遂宴諸王
遣歸帝會羣臣慟哭或勸帝且幸浙或曰不若幸湖湘
方孝孺請堅守京城以待援萬一不利車駕幸蜀收集
士馬以為後舉齊泰奔廣德州黃子澄奔蘄州逃難且

促徵兵時王叔英在廣德募兵無應者子澄欲航海徵兵于外洋不果帝太息曰事出汝輩而今皆棄我去乎長吁不已癸亥燕先鋒將劉保華聚哨至朝陽門外燕王慮京城完繕四方或有勤王者日夜為攻城計乃命保等領先鋒騎兵千餘哨至朝陽門覘知無備還報燕王大喜乃整兵而進先是左都督徐增壽謀應燕御史魏公冕等請誅之不聽至是燕兵進屯金川門帝乃命左右梓增壽至責以大義斬之時谷王穗與李景隆守

金川門燕兵至遂開門降魏國公徐輝祖率師迎戰敗績王馳千餘騎衛周齊二王周王曰吾死矣曰燕王之騎兵也乃喜入見拜且哭燕王亦哭已並轡至金川門下馬登樓燕王具言被讒罹禍不得已舉兵之由與周王相勞苦時朝廷文武俱降來迎帝左右唯數人遂盡閉諸后妃宮內縱火焚之挈三子變服出走倉皇復棄三子於宮門被燕軍執寘師中帝遂遜國去是日如瑞先羣臣叩頭勸進文臣迎附知名者吏部右侍郎蹇義

戶部右侍郎夏原吉兵部侍郎劉儵右侍郎古朴劉季
荒大理寺少卿薛昂翰林學士董倫侍講王景修撰胡
靖李貫編修吳溥楊榮楊溥傅書黃淮芮善待詔解
縉給事中金幼孜胡濙吏部郎中方賓禮部員外宋
禮國子助教王達鄒緝吳府審理副楊士奇桐城知縣
胡儼 揭榜左班文臣二十九人太常寺卿黃子澄兵
部尚書齊泰禮部尚書陳迪文學博士方孝孺副都御
史練子寧禮部侍郎黃觀大理少卿胡閔寺丞鄒瑾戶

部尚書王鈇侍郎郭任盧迴刑部尚書侯泰侍郎暴昭
工部尚書鄭賜侍郎黃福吏部尚書張統侍郎毛大亨
給事中陳繼之御史董鏞曾鳳韶王度高翔魏公冕謝
昇前御史尹昌隆宗人府經歷宋徵卓敬修撰王叔英
戶部主事巨敬燕王指以上諸人為奸臣別其首從先
是出賞格凡文武官員軍民人等綁縛奸臣為首者陞
官三級為從者陞二級綁縛官吏為首者陞二級為從
者陞一級有司奉旨出示自是擒獲得官者甚眾乘機

報私讐劫掠財物者紛紛雖禁不能止也既而鄭賜王
鈍黃福尹昌隆皆迎駕歸附自陳為奸臣所累乞宥罪
令復其官以茹瑺李景隆言并宥張統復為吏部尚書
餘皆不宥尋復揭榜于朝堂增徐輝祖葛成周是修鐵
鉉姚善甘霖鄭公智葉仲惠王璉黃希范陳彥回劉璟
程通戴德彝王良盧原質茅大芳胡子昭韓永葉希賢
林嘉猷蔡運盧振牛景先周璿等共五十餘人丙寅諸
王及文武臣請即位燕王曰子始邁於難不得已以兵

救禍誓除奸惡安宗社庶幾周公之勲不意少主不亮
予心自絕于天今續承洪業當擇有才德者顧予菲薄
豈敢負荷諸王及文武大臣皆頓首曰天生聖人為宗
社生民主今天下者太祖之天下生民者太祖之生民
天下豈可一日無君殿下為太祖嫡嗣德冠羣倫功在
社稷宜正天位使太祖萬世之洪業永有所托丁卯諸
將上表勸進戊辰諸王上表勸進燕王再辭諸王羣臣
頓首固請燕王乃命駕將入城學士楊榮迎駕前曰殿

下先入城耶先謁孝陵耶燕王悟遂謁孝陵畢入城燕王曰諸王羣臣以為奉宗廟宜莫如予宗廟事重予不足稱今辭弗獲勉徇衆志諸王羣臣各宜協心輔予不逮遂詣奉天殿即皇帝位諸王文武羣臣皆上表稱賀復周王橚齊王搏封爵先是建文中有道士歌于途曰莫逐燕逐燕且高飛高飛上帝畿已而忽不見人莫能測至是始驗其言云 清宮三日諸宮人女宮內官多誅死惟得罪于建文者乃得留上詰問宮人內侍以建

文帝所在皆指認后屍應焉乃出屍於煨燼中哭之曰
小子無知乃至此乎召翰林侍讀王景問塋禮當何如
景對曰當塋以天子之禮從之復諸殿門舊名草去興
宗孝康皇帝廟號仍舊謚號懿文皇太子遷太后於懿
文陵降封吳王允熲為廣澤王衛王允熸為懷恩王徐
王允熙為敷惠王尋復降允熲允熸為庶人允熙改封
甌寧王後皆不得其死 追封都督徐增壽為武陽侯
帝念增壽之死痛悼不已故即位首褒封之尋進爵定

國公子孫世襲中山王之後一門二公焉 下魏國公
徐輝祖于獄時武臣無一人不歸附者惟輝祖不屈帝
親召問輝祖不出一語始終無推戴意法司迫取供招
輝祖默然操筆惟書其父開國功臣子孫免死而已帝
大怒以元勲國舅欲誅又輒中止徘徊久之竟從寬典
止勒歸私第草其祿米而已 錄用建文中所罷斥諸
臣馬興張裔李諒等宥前御史尹昌隆命為北平按察司
知事初燕兵南下昌隆上書言今事勢日去而北來奏

章有周公輔成王之語不若罷兵息戰許其入朝彼既欲伸大義於天下不應便相違戾設有蹉跌便須舉位讓之猶不失藩王也若沈吟不斷禍至無日進退無據雖欲求為丹徒布衣不可得矣不報及是按名捕治奸黨昌隆被執將就刑當陞大呼曰臣曾上章勸以位讓陛下奏牘尚存可覆案也帝乃命停刑閱其奏流涕曰火燒頭若早從此言南北生靈可免酷禍朕亦無此勞苦也詔貸其死得建文時羣臣封事干通命解縉等

閱視凡言兵食事宜者留覽餘有干犯者悉焚之既而
從容問縉等曰爾等宜皆有之衆稽首未及對修撰李
貫對曰臣實無之帝曰爾以獨無為賢耶食其祿則思
任其事當國危之際近侍獨無一言可乎朕非惡乎盡
心于建文者但惡導誘建文壞祖宗法亂政經耳爾等
前日事彼則忠於彼今日事朕則忠於朕不必曲自隱
蔽也帝臨朝詰問建文中變亂官制顧侍臣太息曰
只如羣臣散官一事前代沿襲行之已久何關利害亦

欲改易且陵土未乾何忍紛紛為此又曰凡開創之主其經歷多謀慮深每作一事必籌度數日乃行亦欲子孫世守之故詩書所載後王之言必曰不愆不忘率由舊章于戒警後王必曰率乃祖攸行曰監於先王成憲此皆老成之言後世輕佻諂諛之徒以其私智小見冀嗣君改易祖法嗣君不明以為能而寵任之徇小人之智謀至于國樊民叛而喪其社稷者有之矣豈可不以為戒時吏部尚書張紱懼退而自經死 秋七月壬午

朔大祀天地于南郊以即位詔天下大赦仍以洪武三十
五年為紀改明年為永樂元年建文以來祖宗成法
有更改者悉復舊制 幽建文帝少子於中都廣安宮
後莫知所終 召前北平按察使陳瑛至京以為都察
院右副都御史初瑛坐交通藩邸謫廣西帝即位首召
用之瑛怨建文諸臣最深既而瑛奏言建文之臣如黃
觀廖昇王叔英周是修顏伯瑋皆不順天命而效死于
建文計其存心與叛逆無異宜加追戮帝曰朕初舉義

誅奸臣不過齊黃數輩耳其後二十九人中如張統王
鈍鄭賜黃福尹昌隆等皆宥而用之今汝所言數人其
身已死況有不與二十九人之數者彼食其祿自盡其
心耳不聽擢戶部侍郎夏原吉為戶部尚書初原吉
自福建召還帝欲大用之忌者或沮之曰彼建文用事
之臣豈宜置之高位上曰原吉父皇太祖之臣也彼忠
於太祖故忠於建文豈不忠於朕哉逾月遂進擢尚書
九月封賞從征將士封丘福為淇國公朱能為成國

公張武為成陽侯鄭亨為武安侯顧成鎮遠侯王聰武
成侯陳珪泰寧侯孟善保定侯郭亮成安侯王忠靖安
侯徐忠永康侯張信隆平侯李遠安平侯徐祥興安伯
徐理武康伯李濬新城伯唐雲新昌伯孫巖應城伯趙
彝忻城伯陳旭雲陽伯張玉子張輔信安伯譚淵子譚
忠新寧伯已上並子孫世世承襲封房寬為思恩侯子
孫世襲指揮房勝為富昌伯劉才廣恩伯子孫世襲指
揮同知以曹國公李景隆兵部尚書如瑞都督王佐陳瑄

有默相事機功增景隆祿一千石封茹璫忠誠伯王佐
順昌伯陳瑄平江伯子孫世襲指揮使以駙馬都尉王
寧惟誣陷封永春侯子孫世世承襲餘將士論功有差
成祖永樂元年詔以北平布政司為北京設留守及行
部官改北平為順天府

谷應泰曰天未厭兵孝康蚤世燕王在北怏怏非
少主臣也然而高帝賓天太孫即位令帝開誠布
公杜讐修睦几杖之賜頻及智囊之計不行獄詞

燒毀曲庇梁王朝士留章封還錢俶羈縻之道亟
行柴章之謀未決也若謂事憂厝火計決徙新季
友進酒而叔牙亡玄武喋血而建成敗當其堂皇
不避升陞不拜則相如秦筑血犯秦王朱虛行酒
追斬呂氏抑數武士力耳齊黃獨不能乎建文仁
柔類元帝舉事則學景宣齊黃迂謹類王陵進謀
則效鼂錯先主已去操乃追擊當陽劉裕辭歸玄
乃悔使京口為燕王者將散甲歸兵縛見天子乎

抑束手無策闔門自焚也遣張曷遣謝貴彼豈能
擒燕王者哉速之反而假以名也燕既起兵非帝
殺王即王弑帝其傳檄天下自比周公上書帝闕
欲清君側呼忱日月指誓河山藉令帝囚縛齊黃
歸致燕館亦或開門延叔握手迎師王敦既收伯
仁安能反臣姑孰侯景朝見太極惟有幽帝東堂
史稱文帝伏犀日角皇孫落月偏顱天生兩人聚
於一宮久無瓦全之理矣而齊黃用兵罪自難追


真定之戰炳文所將三十萬鄭村壩之戰景隆所將五十萬白溝河之戰景隆合兵又三十萬淳沱河之戰盛庸所將猶二十萬合天下之兵握一人之手不知燕王單旅孤城利於戰不利於守利於合不利於分嚮令山東北平堅城深溝繕甲儲粟驍將數十輩各將數萬衆分據險阻出沒敵間進破滎陽彭越燒其糧道南追漢王韓信收其河北燕王雖百戰百勝久且左支右詘寧能縱馬飲濟

水之西加矢及聊城之上乎柰何挾萬全之勢搏
匹夫之勇驚飈掃葉疾電奔雷執九江於朝堂哭
包胥於海外嗚呼晚已獨是建文之初昇平繼體
海宇晏清而燕王橫貪天位覲顏人上子突入而
昭公出奔曲沃盛而孝侯遇弑母亦弱肉強食豈
為天與人歸宜乎練子寧啖血地上書成王安在
而方初孺哀經大罵以為不立成王之子弟也當
其大內灰飛縑衣宵遁為燕王者急宜降德音下明

詔咸與維新計安反側而乃縣賞討奸清宮戮御
斬祛之怨旁及五宗射鉤之嫌蔓延婦寺國君含
垢固如是乎至若司馬之心久暴於路人齊鸞之
謀早形於諮議乃猶南向讓三連章勸進者欺天
乎吾誰欺也幸而即位之後山東首給農器雲南
不輕用兵省視旱蝗周諏郡縣勅吏部以拔幽隱
顧學士以求直言而且耀武邊陲尊崇先聖政事
之美頗斑斑可考焉然以予論之梁皇弑主肺石

達寬衛武篡兄賓筵好學蓋曲終奏雅逆取順守
亦晚蓋之常規非哲王之天性也

明史紀事本末卷十六



總校官庶吉士臣張能照

校對官編修臣閔惇大

膳錄監生臣任益春